

REGLUGERÐ

124

16. ágúst

fyrir vinnustofur Sambands íslenzkra berklasjúklinga að Kristneshæli.

1. gr.

Nafn fyrirtækisins er: Vinnustofur SÍBS að Kristneshæli.

2. gr.

Fyrirtækið er eign Sambands íslenzkra berklasjúklinga og rekið af því, samkvæmt því, sem nánar greinir í reglugerð þessari.

Reikningshald fyrirtækisins skal vera skilið frá reikningshaldi sambandsins í heild.

3. gr.

Tilgangur fyrirtækisins er að sjá þeim sjúklingum, sem á Kristneshæli dvelja á hverjum tíma og til þess eru færir að dómi lækna hælisingis, fyrir hentugri vinnu, svo og námi.

Fari svo, að dómi eiganda, að fyrirtækið nái ekki tilgangi sínum og hann telji, af þeirri orsök eða öðrum, að rétt sé að hætta rekstri þess, skal af óskiptum eignum afhenda félaginu Sjálfsvörn á Kristneshæli vélar þær og áhöld, er keyptar hafa verið fyrir framlag úr Vinnustofusjóði Kristneshælis.

4. gr.

Stjórn fyrirtækisins skal skipuð fimm mönnum, tveim kosnum af félagi berklasjúklinga í Kristneshæli, einum af félaginu Berklavörn á Akureyri, enda séu bæði félögin í SÍBS, einum af þingi SÍBS, og sé hann meðlimur félagsins Berklavörn á Akureyri, fimmti maður sé yfirlæknir Kristneshælis. Sömu aðilar kjósa jafnmarga varamenn.

Stjórnin ræður málefnum fyrirtækisins, og er hún kosin til tveggja ára.

Stjórn fyrirtækisins heldur fundi svo oft, sem þörf krefur. Fundirnir skulu haldnir í Kristneshæli.

Á stjórnarfundum ræður afl atkvæða úrslitum og er fundur lögmætur, ef meir en helmingur stjórnarmanna situr fund.

5. gr.

Stjórn fyrirtækisins ræður forstjóra í samráði við sambandsstjórn SÍBS, ákveður launakjör hans og setur honum erindisbréf. Þurfi annað starfsfólk við fyrirtækið, ráða forstjóri og yfirlæknir það og ákveða kjör þess, í samráði við stjórn fyrirtækisins.

6. gr.

Reikningsár fyrirtækisins er almanaksárið. Reikningar fyrirtækisins skulu lagðir fyrir sambandsstjórn SÍBS, stjórn félagsins Sjálfsvörn í Kristneshæli og stjórn félagsins Berklavörn á Akureyri, til samþykktar, endurskoðaðir af löggiltum endurskoðendum.

7. gr.

Yfirlæknir ákveður í hverju tilfelli daglegan vinnustundafjölda sjúklinga. Sjúklingar, sem við fyrirtækið vinna, fá greidd laun fyrir vinnu sína, enda njóti fyrirtækið allrar starfsorku þeirra. Stjórnin ákveður launagreiðslur til sjúklinga á hverjum tíma, að fengnum tillögum forstjóra. Af launum sínum skulu sjúklingar greiða ákveðinn hundraðshluta, er stjórnin ákveður, hve hár skuli vera á hverjum tíma. Greiðslur þessar skulu renna í sjóð, sem stjórn fyrirtækisins, ásamt sambandsstjórn SÍBS, setur reglugerð um.

124

16. ágúst

Fyrirtækið hefur ókeypis afnot af vinnustofum Kristneshælis, en fjármál þess eru hælinu og ríkissjóði óviðkomandi.

8. gr.

9. gr.

Reglugerð þessari getur sambandsstjórn Sambands íslenzkra berklasjúklinga breytt að fengnum tillögum framkvæmdastjórnar, enda verði breytingarnar staðfestar af heilbrigðismálaráðherra.

Reglugerð þessi er hér með sett samkvæmt lögum nr. 78 23. júní 1936, til þess að öðlast gildi þegar í stað.

Í heilbrigðismálaráðuneytinu, 16. ágúst 1949.

Eysteinn Jónsson.

Ragnar Bjarkan.

125

18. ágúst

REGLUGERÐ

um breyting á reglugerð nr. 12 24. jan. 1945 fyrir vinnuheimili Sambands íslenzkra berklasjúklinga að Reykjum í Mosfellssveit.

1. gr.

Í fyrirsögn komi orðið: Reykjalundi, í stað orðsins „Reykjum“.

2. gr.

7. gr. orðist svo:

Stjórn stofnunarinnar skal skipuð fimm mönnum, tveim kosnum af sambandsstjórn Sambands íslenzkra berklasjúklinga, tveim kosnum af félagi vistmanna stofnunarinnar, enda sé það í Sambandi íslenzkra berklasjúklinga, og einum af þingi Sambands íslenzkra berklasjúklinga. Sömu aðilar kjósi jafn marga varamenn og aldrei skulu fleiri en tveir vistmenn eiga sæti í stjórn vinnuheimilisins samtímis. Stjórnin ræður málefnum stofnunarinnar. Stjórnin skal kosin til tveggja ára. Stjórn stofnunarinnar heldur fundi svo oft sem þörf krefur og skulu fundargerðir hennar bókaðar. Á stjórnarfundum ræður afl atkvæða úrslitum og er fundur lögmætur, ef meira en helmingur stjórnarmanna situr fund.

3. gr.

Í stað orðsins „miðstjórn“ í 8. gr. komi: sambandsstjórn.

4. gr.

9. gr. orðist svo:

Stofnunin rekur ýmsar atvinnugreinar við hæfi vistmanna. Fyrir hverja atvinnugrein skal hafa sérstakt reikningshald. Reikningsár starfsgreina og stofnunarinnar í heild er almanaksárið. Stjórn stofnunarinnar skal gæta þess, að vörubirgðir, peningar og aðrar eignir séu rétt taldar um áramót. Reikningar stofnunarinnar skulu lagðir fyrir sambandsstjórn SÍBS og stjórn félags vistmanna, endurskoðaðir af löggiltum endurskoðanda, til samþykktar.

Enn fremur skulu reikningar vinnuhælisins sendir til deilda sambandsins ár hvert.

5. gr.

Í stað orðsins „miðstjórn“ í 16. gr. komi: sambandsstjórn.

Reglugerð þessi staðfestist hér með samkvæmt lögum nr. 30 19. júní 1933, til að öðlast gildi þegar í stað og birtist til eftirbreytni öllum þeim, sem hlut eiga að máli.

Í heilbrigðismálaráðuneytinu, 18. ágúst 1949.

Eysteinn Jónsson.

Ragnar Bjarkan.